



DIARIO

E MATUTINO DI ARUBA

DIASABRA 2 FEBRUARI 1991

ABONADO PA LUNA 19,00 FLS**PA EJEMPLAR 0,80 AÑA10/NO.3251

Robert Jeandor Rey di Tumba



Ayera nochi den Stadion di RCA, unda cu mas o ménos 4000 persona a paga pa presencia e Tumba Contest, Aruba un biaha mas a haya su yiu di tera como Rey di Tumba Robert Jeandor. E otro finalistanan a keda den pesona di Tatoo na di dos lugar, Chicho Kock na di tercer lugar, Didi Wernet na di cuatro lugar y Vicente Kelly na di cinco lugar.

Segun fuentenan digno di credito:

Ing. Roland Lacle lo bira Ministro di Finanzas

ORANJESTAD (AAN): Informenan cu a alcanza DIARIO ayera for di fuentenan digno di credito, a muestra cu tur probabilidad ta, cu Ministro Plenipotenciario, esta Ing. Roland Lacle lo bira e Ministro di Finanzas nobo di Gobierno di Aruba.

Pa reemplaza na Hulanda, MEP lo a pensa den direccion di Grace Bareño of Cay Marquez, pero aparentemente nan candidatura lo no resulta den nombramento.

Otro dos persona, cu a

worde menciona como candidato pa e puesto di Ministro di Finanzas tabata Milton Henriquez y Efraim de Kort, pero aparentemente ing. Roland Lacle lo ta e candidato favorito na e momentonan aki.

Gobierno a stop cu boycott contra La Prensa

ORANJESTAD (AAN): Cu gran preocupacion DIARIO a tuma nota di e decision di Pers Chef di Gobierno pa prohibi Servicio di Informacion di Gobierno pa pasa comunicadonan na e vespertino, La Prensa.

Di e forma aki atrobe Gobierno a duna muestra di e mentalidad anti-democratico, cu cual el a presenta su mes durante ultimo añanan y atrobe Gobierno, pa medio di su Perschef a trapa riba un derecho sagrado den un comunidad, cu ta Libertad di Prensa.

Democracia integral ta exige respet pa libertad di expresion y si Gobierno no ta dispuesto di obedecer e normanan mas elemental di nos Constitucion, e posiciona su mes fuera di ley.

Aparentemente despues di hopi critica Gobierno silenciosamente a stop cu e prohibicion, y ayer tardi atrobe a cuminsa entrega comunicadonan di Servicio Informativo na La Prensa,

pero no a manda ningun contesta pa Redaccion di e vespertino, quizas pa pone den lachi di oïvido.

Sumamente preocupante ta e cuadro, cu ta worde pinta awendia pa e mancho di Gobierno.

Akinan por menciona entre otro e forma con un Ministro ta tranca actuacion di Polis; e cantidad di casonan di persecucion di ciudadanonan inocente; e filosofia di nacionalizacion cu a keda presenta aña pasa; e caso di deportacion masal di trahadornan extranhero contra loke ta para den Constitucion, tur ta indica den e direccion di dictadura total y naturalmente no ta duna muestra di un pais democratico y respetuoso di Ley.

Dos avion a dal den otro na Los Angeles

LOS ANGELES: Ayeranochi pa exactamente 10:08 p.m. (ora di Aruba) un Boeing 737-300 di US Air cu 89 persona abordo incluso 6 miembro di tripulacion durante su aterizaje a dal den un avion chikito di commuter di Skywest. Por a mira un bola di candela riba pista 24L.

E avion di USAir cu vuelo 1493 a sali for di Syracuse (New York), pasa Washington (DC), sigui pa Columbus (Ohio), pasa Los Angeles (California) y mester a

sigui pa San Francisco. Polis a bisa cu 3 persona a perde nan bida, mientras cu 30 otro a ser herida. E avion a keda lastra riba e pista y hopi pisa a keda plama rond.